

四庫全書

子部

欽定四庫全書

冊府元龜卷八百三十六

宋 王欽若等 撰

總錄部

養生

韜晦

養生

文子曰太上養神其次養形夫人之生也稟天地之中
鍾五行之秀資之以恬淡則生理固濟之以頤攝則德
寓充蓋夫導引以為壽著於蒙莊之說吐吸以練藏傳

夫王吉之論養生之時義遠矣其有養其外而不養其
內者或被其苦養其內而不養其外者亦嬰乎害此偏
枯之人不足尚也若乃內外相養形神交泰六疾不生
世患罔極斯達人之善養哉故潛山隱谷服芝餌朮靜
居導引熊經鴟顧以養形也絕慮棄智黜聰去羨玄真
寡欲清虛自守以養神也乃有益壯不衰長齡加倍與
夫大勞而弊不節而嗟者異焉

周老子百有六十餘歲或言二百餘歲以其修道而養

壽也

漢張良以高祖五年封留侯良從入關性多疾即導引

不食穀

服辟穀藥而靜居行起

閉門不出後行太子少傅事願棄

人間事欲從赤子遊

赤松子僊人號也神農時為雨師服水玉教神農能入火不燒

乃

學道欲輕舉

仙道謂

後漢矯慎隱遯山谷因穴為室仰慕松喬道引之術

王充會稽上虞人刺史董勤辟為從事轉治中自免還

家年漸七十力志衰耗乃造養性書十六篇裁節嗜欲

顧神自守

蘇順京兆霸陵人也。以才學見稱。好養生術。隱處求道。晚乃仕。拜郎中。卒於官。

華佗字元化。沛國譙人。一名敷。曉養性之術。年且百歲。而猶有壯容。時人以為仙。廣陵吳普。彭城樊阿。皆從佗學。普依準佗治療。多所全濟。佗語普曰。人體欲得勞動。但不當使極。爾動搖則穀氣得消。血脉流通。病不得生。譬猶戶樞不朽也。是以古之僊者。為導引之事。熊經鴟

顧熊經若熊之攀枝自懸引挽腰體動諸關節以求難

老吾有一術名五禽之戲一曰虎二曰鹿三曰熊四曰

猿五曰鳥亦以除疾兼利蹄足以當導引體中不快起

作一禽之戲沾濡汗出因上著粉身體輕便而欲食普

施行之年九十餘耳目聰明齒牙完堅阿從佗求方可

服食益於人者佗授以漆葉青麩散

青麩一名地節一名黃芝主五藏益

精氣本出於迷入山者見仙人服漆以告佗佗以為佳語阿阿又祕之

葉屑一斗青麩十

四兩以是為率言久服去三蟲和五臟輕體使人頭不

白阿從其言壽百餘歲

冷壽光與華佗同時年可百五六十歲嘗屈頸鵲息

雉

也鬚髮盡白而色如三四十歲

魯女生長樂人初餌胡麻及朮絕穀八十餘年日少壯
色如桃花日能行三百里走及麋鹿女生與華佗同時
而說明帝時事甚明了議者疑其時人也董卓亂後莫
知所在

封君達隴西人初服黃連五十餘歲入鳥舉山服水銀

百餘年還鄉里如二十年聞魯女生得五岳圖連年請
求女生未見授

王真上黨人年且百歲視之面有光澤似未五十者自
云周流登五岳名山悉能行胎息胎食之方噉舌下泉

咽之不絕房室

一云真宗經習閉氣而吞之名曰胎息
噉舌下泉而咽之名曰胎食真絕穀百

餘年肉色光
美力並數人

孟節上黨人能含棗核不食可至五年一年又能結氣
不息身不動搖狀若死人可至百日半年亦有室家

晉嵇康字叔夜嘗脩養性服食之事彈琴詠詩自足於懷以為神仙稟之自然非積學所得至於導養得理則安期彭祖之壽可及乃著養生論官至中散大夫

張中字巨和中山人永嘉之亂隱於泰山恬靖寡欲清虛服氣食芝餌石修導養之方

郭瑀隱於臨松薤谷鑿石窟而居服栢實以輕身

陶淡字處靜幼孤好導養之術謂仙道可祈年十五六便服食絕穀不婚娶家累千金僮客百數淡終日端拱

曾不營問於長沙臨湘山中結廬居之州舉秀才淡聞
遂轉逃羅縣埤山中莫知所終

宋劉凝之字志安隱居衡山之陽登高嶺絕人迹處為
小屋居之採藥服之

南齊顧歡吳郡鹽官人好學於天臺山開館聚徒晚節
服食不與人通

梁陶弘景丹陽秣陵人幼有異操年十歲得葛洪神仙
傳書一夜研尋便有養生之志謂人曰仰青雲觀白日

不覺為遠矣天監四年移居積金澗行辟穀導引之法年逾八十而有壯容深慕張良之為人云古賢莫比

劉虬字靈預為當陽令罷官歸家靜處斷穀餌朮及胡麻

後魏崔浩為左光祿大夫以公歸第因欲修服食養性之術而寇謙之有神中錄圖新經浩因師之

徐謩字成伯善醫嘗有樂餌及吞服道符年垂八十而鬢髮不白力未多衰

北齊繇吾道榮瑯琊人隱於瑯琊山辟穀餌松朮茯苓
求長生之祕

隋徐則幼沉靜寡嗜欲後辭入天台山因絕粒養性所
資惟松朮而已

唐王希夷孤貧好道隱於嵩山師道士黃頤向四十年
盡傳其閉氣導養之術嘗餌松柏葉及雜花散博通子
史尤明莊老及易景龍中年已七十餘氣力益壯

孫思邈隱居太白山自言九十三歲鄉里咸云數百歲

高宗顯慶中被徵至時盧照隣有惡疾固問思邈名醫
愈疾之道又問人事如何思邈曰膽欲大而心欲小智
欲圓而仁欲方照隣曰何謂也思邈曰心為五臟之君
君以恭慎為主故心欲小膽為五臟之將將以果決為
務故膽欲大智者動象天故欲圓仁者靜象地故欲方
詩曰如臨深淵如履薄冰謂小心也趙趙武夫公侯干
城謂大膽也傳曰不為利回不為義疚仁之方也易曰
見機而作不俟終日智之圓也照隣又嘗問曰養性之

道其要何也邈曰天道有盈缺人事多迤厄苟不自慎而能濟於迤厄者未之有也故養性之士先知自慎慎者嘗以憂畏為本經曰人不畏威則大威至矣憂畏者生死之門存亡之繇禍福之本吉凶之元也故士無憂畏則仁義不立農無憂畏則稼穡不滋工無憂畏則規模不設商無憂畏則貨殖不成子無憂畏則孝敬不篤父無憂畏則慈愛不著臣無憂畏則勲庸不立君無憂畏則社稷不安故養性者失其憂畏則心亂而不理形

躁而不寧神散則氣越志蕩而意昏應生者死應存者
亡應吉者凶故憂畏者猶水火不可暫忘也人無憂畏
子弟為勍敵妻妾為仇讐是故太上畏道其次畏物其
次畏人其次畏身憂於身者不拘於人畏於己者不制
於彼慎於小者不懼於大戒於邇者不悔於遠能如此
者水行蛟龍不能害陸行虎兕不能傷五兵不能染讒
賊誹謗毒螫不能加害知此則人事畢矣

仲長子隱士也服食養性

潘師正清靜寡欲居於嵩山之逍遙谷積二十餘年但服松葉飲水而已

司馬承禎師事潘師正傳其符錄及辟穀導引服餌之道

孟詵為同州刺史中宗神龍初致仕歸伊陽之山第年雖晚暮志力如壯嘗謂所親曰若能保身養性者常須善言莫離口良藥莫離手

趙昌年七十二精健如少年德宗甚奇之憲宗元和三

年除華州刺史辭於麟德殿時年八十趨拜輕捷占對
詳明帝退而嘆異詔宰臣密訪願養之道以奏焉

柳公度善攝生年八十餘步履輕便或祈其術曰吾初
無術但未嘗以元氣佐喜怒氣海嘗溫耳

後唐許寂不知何許人少有道術茹芝絕粒寓居江陵
節度使趙凝昆季禮遇之延之中堂師授保養之道唐
末除諫官不起漢南謂之徵君梁攻襄陽趙凝兄弟棄
鎮奔蜀與寂偕行歲餘蜀人知之蜀主王建待以師禮

後位至蜀相同光末平蜀與王衍俱徙于東卜居于雒
寂以高年精彩猶健冲漠寡言時獨語云可怪可怪人
莫知其際言有還丹煮金之術不知信否卒時年八十
餘

晉盧損為祕書監拜章辭位乃授戶部尚書致仕退居
潁川時李鱗年將八十善服氣導引損以鱗之遐壽有
道術酷慕之仍以潁川逼城市乃卜居陽翟立隱舍誅
茅種藥山衣野服逍遙於隱几之間出則柴車鶴氅自

稱具茨山人晚年與同遊五六人於大隗山中古宮觀
址疏泉鑿坏為隱所誓不復出山氣嚴寒被病而卒時
年八十餘齒髮不衰而有壯容損於修攝似有所得

韜晦

夫用晦而明犧易之旨深藏若虛老氏之訓與其錚錚
而懼患孰若恂恂而俟命有竒才盛德偉度壯心可以
樹功名可以經邦國而乃懼此多難不能自奮或辱在
泥滓或委於檻穽屈高翔之羽同夫雌伏藏兼濟之用

以之同塵葆光而內融懷寶而自處不形于色克保其
真亦既安全終復顯發信君子之大受達人之盛德者
哉

甯武子衛大夫也夫子云甯武子邦無道則愚其愚不
可及也

荆軻衛人也游於邯鄲魯句踐與荆軻博爭道魯句踐
怒而叱之荆軻默而逃去遂不復會至燕而高漸離飲
於燕市酒酣高漸離擊筑荆軻和而歌於市中相樂也

已而相泣旁若無人

毛公薛公皆趙之處才也毛公藏於博徒薛公藏於賣

漿

漢樂布梁人也彭越為家人時嘗與布游

家人猶編戶也

窮困

賣庸於齊為酒家保

庸謂庸作受顧保謂保可任使

數歲別去而布為

人所略賣為奴於燕為其家報仇燕將臧荼舉以為都

尉

樊噲以屠狗為事

時人食狗以羊豕同故噲專屠以賣

後與高祖俱隱於

芒碭山澤間陳勝起蕭何曹參使噲求迎高祖立為沛
公位至相國封舞陽侯

酈食其好讀書家貧落魄無衣食業

魄音薄落魄
失業無歸也

為里

監門然吏縣中賢豪不敢役

吏及賢者豪者皆
不敢使役食其

皆謂之

狂生後歸漢號廣野君

東方朔武帝時為郎數召至前談語時賜之食於前飲
已盡懷其餘肉持去衣盡污數賜縑帛擔揭而去後用
所賜錢帛取少婦於長安中好女率取歸一歲取者即

棄去更取婦所賜錢財盡索之於女子主左右諸郎半呼之狂人人主聞之曰令朔在事無為是行者若等安能及之哉朔任其子為郎又為侍謁者嘗持節出使朔行殿中郎謂之曰人皆以先生為狂朔曰如朔等所謂避世於朝廷間者也古之人乃避世於深山中時坐席中酒酣據地歌曰陸沈於俗避世金馬門宮殿中可以避世全身何必深山之中蒿廬之下金馬門者官署門也傍有銅馬故謂之曰金馬門

東郭先生齊人也以方士久待詔公車貧困饑寒衣敝履不完行雪中履有上無下足盡踐地道中人笑之東郭先生應之曰誰能履雪中令人視之其上履也其履下處乃似人手足者乎其拜為二千石佩青緇音爪綬也音爪出宮門行謝主人故所以同官待詔者等比祖道於都門外榮華道路立名當世此所謂衣褐懷寶者也任安少孤貧為人將車之長安求為小吏於是安與田仁俱為衛將軍舍人居門下同心相愛此二人家貧無

錢用以事將軍家監家監使養惡蓄馬兩人同牀卧仁
竊言曰不知人哉家監也安曰將軍尚不知人何乃家
監也

後漢王君公遭亂僧牛自隱僧為平會兩家買賣之價時人謂之論

曰避世牆東王君公君公明易為郎數言事不用自污與官婢通免歸詐狂僧牛口無二

也價

向栩朝歌人少時為書生性卓詭不倫嘗讀老子狀如
學道又似狂生好被髮著絳綃頭綃生絲也當作燥音此消切嘗於

竈北坐板床上如是積久板乃有膝踝足指之處不好
語言而喜長嘯賓客從就輒伏而不視有弟子名為顏
淵子貢季路冉有之輩或騎驢入市乞丐於人或悉要
諸乞兒俱歸止宿為設酒食時人莫能測之

後為
侍中

孔嵩南陽人初游太學後家貧親老乃變姓名傭為部
野阿里街卒友人荊州刺史范式行部縣選嵩為導騶
迎式式見而識之勅縣代嵩嵩以先傭未竟不肯去嵩
官至南海太守

第五倫字伯魚京兆長陵人為鄉嗇夫平徭賦理怨結
得人歡心自以為久宦不達遂將家屬客河東變名姓
自稱王伯齊載鹽往來太原上黨所過輒為糞除而去
陌上號為道士親友故人莫知其處後京兆尹閻興召
為主簿

公沙穆少游太學無資糧乃變服容傭為吳祐債春後
為遼東屬國都尉

仇覽少為儒生淳默鄉里無知者年四十縣召補吏後

為蒲亭長

荀悅性沉靜美姿容尤好著述靈帝時闈宦用權士多
退身窮處悅乃託疾隱居時人莫之識從弟或特稱敬
焉後辟鎮東將軍曹公府

仲長統山陽高平人性倜儻敢直言不矜小節每列郡
命名輒稱疾不就語默無常時人或謂之狂

魏郭嘉為司空軍祭酒嘉少有遠量漢末天下將亂自
弱冠匿名迹密交結英雋不與俗接故時多莫知惟識

達者奇之

嚴幹義者馮翊東縣人質性重厚有器識會三輔亂人多流宕而幹義不去與諸知故相浮沈採樵自活

王烈字彥考名聞在邠原管寧之右辟公孫度長史以商賈自穢太祖命為丞相掾未至卒

蜀杜微字國輔梓潼涪人少受學於廣漢任安劉璋辟為從事以疾去官及先主定蜀微嘗稱聾閉門不出

諸葛亮依從父玄玄依袁術後往荊州依劉表玄卒亮

躬耕隴畝好為梁父吟家于南陽之鄧縣在襄陽城西
二十里號曰隆中亮在荊州時建安初與潁川石廣元
徐元直汝南孟公威等俱游學三人務於精熟而亮獨
觀其大略每晨夜從容抱膝長笑而謂三人曰卿諸
人仕進可至郡守刺史也三人問其所至亮但笑而不
言後公威思鄉里欲北歸亮謂之曰中國饒士大夫遨
游何必故里邪亮位至丞相

晉阮籍字嗣宗本有濟世志為步兵校尉屬魏晉之際

天下多故名士少有全者籍繇是不與世事遂酣飲為

常雖不拘禮教然發言玄遠不臧否人物

又云魏末阮籍有才而嗜

酒荒放露頭散髮裸袒箕踞作二十石不治官事日與羣下共飲酒歡呼時人或以籍生在魏晉之交欲佯狂

避時不知籍本性自然也

山濤字巨源早孤居貧少有器量介然不羣性好莊老
每隱身自晦後為侍中領吏部

魏舒字陽元不修常人之節不為皎厲之事累遷後軍
將軍鍾毓長史毓每與參佐射舒常為畫籌而已後遇

朋人不足以舒滿數甌初不知其善射舒容範閑雅發
無不中舉坐愕然莫有敵者甌嘆而謝曰吾之不足以
盡卿才有如此射矣位至司徒

王衍字夷甫武帝泰始八年詔舉奇才可以安邊者衍
初好論從橫之術故尚書盧欽舉為遼東太守不就於
是口不論世事唯雅詠玄虛而已

王長文廣漢人州辟別駕乃微服竊出舉州莫知所之
後於成都市中蹲踞齧胡餅刺史知其不屈禮遣之

王湛少言語初有隱德人莫能知兄弟宗族皆以為癡其父袒獨異焉湛兄子濟嘗詣湛見牀頭有周易問曰叔父何用此為湛曰體中不佳時脫復看耳濟請言之湛因剖析玄理微妙有竒趣皆濟所未聞也濟才氣抗邁於湛略無子姪之敬既聞其言不覺慄然心形俱肅留連彌日累夜自視缺然乃嘆曰家有名士三十年而不知濟之罪也既而辭去湛送至門濟有從馬絕難乘濟問湛曰叔頗好騎不湛曰亦好之因騎此馬姿容既

妙迴策如縈善騎者無以過之還白其父曰濟始得一
叔乃濟以上人也武帝亦以湛為癡每見濟輒調之曰
卿家癡叔死未濟嘗無以答及是帝又問如初濟曰臣
叔殊不癡因稱其美帝曰誰比濟曰山濤以下魏舒以
上時人謂湛上方山濤不足下比魏舒有餘湛聞曰欲
處予以季孟之間乎卒為汝南內史
嵇康善鍛以向秀為之佐相對欣然傍若無人又共呂
安灌園於山陽康後仕至中散大夫

王舒字處明丞相導之從弟父會侍御史舒少為從兄
敦所知以天下多故不營當時名嘗處私門潛心學殖
年四十餘州禮命太傅辟皆不就

王述性沉靜每坐客馳辨異端並起而述處之恬如也
少襲父爵年三十尚未知名人或謂之癡司徒王導以
門地辟為中兵屬既見無他言惟問以在東米價述但
張目不答導曰王掾不癡人何言癡也官至衛將軍尚

書令

顧榮懷帝永嘉初為尚書郎太子中舍人廷尉正嘗縱酒酣暢謂友人張朝曰惟酒可以忘憂但無如作病何耳齊王冏召為大司馬主簿冏擅權驕恣榮懼及禍終日昏酣不綜府事以情告友人長樂馮熊又謂冏長史葛旻曰以顧榮為主簿所以甄拔才望委以事機不復計南北親疎欲平海內之心今府大事殷非酒客之政旻曰榮江南望士且居職日淺不宜輕代易之熊曰可轉為中書侍郎榮不失清顯而府更收實才旻然之白

罔以為中書侍郎在職不復飲酒人或問之曰何前醉而後醒邪榮懼罪乃復更飲

謝鯤不徇公名無砥礪行居身於可否之間雖自處若穢而動不累高王敦有不臣之迹顯於朝野鯤知不可以道規正乃優游寄適不屑政事從容諷議卒歲而已為王敦大將軍長史

謝安少有重名不就徵辟時弟萬為西中郎將總藩任之重安妻劉惔妹也既見家門富貴而安獨靜退乃謂

曰大夫不當如此耶安掩鼻曰恐不免耳及萬黜廢安始有仕進志時年已四十有餘矣後辭大司馬桓溫府官至太保

幸靈豫章建昌人性少言與小人羣居見侵辱而無愠色邑里號之癡雖其父母兄弟亦以為癡也嘗者稻羣牛食之靈見而不驅待牛去乃往理其殘亂者其父母見而怒之靈曰夫萬物生天地之間各欲得食牛方食奈何驅之其父愈怒曰即如汝言復用理壞者何為靈

曰此稻又欲得終其性牛自犯之靈可以不收乎

宋鮑照世祖時為中書舍人帝好為文章自為物莫能及照悟其自為文多鄙言累句當時咸謂照才盡實不然也

徐羨之為司空錄尚書令頗工奕碁觀戲嘗若未解當世以此推之傅亮蔡郭嘗言徐公曉萬事安異同

南齊王僧虔弱冠善隸書宋孝武欲擅書名僧虔不敢顯迹大明世嘗用屈筆書以此見容位至侍中特進左

光祿大夫

謝瀟肱之弟肱為吳興太守瀟於征虜渚送別肱指瀟口曰此中唯宜飲酒瀟建武之朝為吏部尚書專以長酣為事與劉瑱沈昭略交飲各至數斗

沈昭略為臨海太守御史中丞昭略明帝建武世嘗酣酒以自晦

後魏任城王澄宣武時為太子太保於時高肇當朝猜忌賢戚澄為肇間構嘗恐不全乃終日昏飲以示荒敗

所作詭越時謂為狂

崔巨倫為殷州刺史在州陷賊葛榮聞其才名欲用為黃門侍郎巨倫心惡之至五月五日會集官僚令巨倫賦詩巨倫乃曰五月五日時天氣已大熱狗便呀欲死牛復吐出舌以此自晦獲免

柳遠字李雲為儀同開府叅軍事放情琴酒之間每出行反家或問有何消息答曰無所聞縱聞亦不解

北齊邢劭為著作佐郎文學典麗既贍且速嘗為先達

所嫉屬尚書令元羅出鎮青州啟為府司馬遂在青土
終日酣賞盡山水之致

隋王世積為上柱國甚見隆重世積見文帝性忌刻功
臣多獲罪繇是縱酒不與執政言及時事帝以為有酒
疾舍之宮內令醫者療之世積說稱疾愈始得就第
李士謙趙郡平棘人隋有天下畢志不仕時平生為詠
懷詩輒毀棄其本不以示人

唐裴遵慶絳州聞喜人志氣深厚機鑑敏達自幼強學

博涉載籍謹身晦迹不干當世之務位至黃門侍郎平章事

楊綰尤工文詞藻思清瞻含光晦用不欲名彰每屬文耻於自白非知己不可得而見也後位至中書侍郎平章事

冊府元龜卷八百三十六

欽定四庫全書

冊府元龜卷八百三十七

宋 王欽若等撰

總錄部

文章

易曰觀乎人文以化成天下仲尼曰言之不文行之不遠蓋斯文之作其來尚矣經藝之設本於儒術辭賦之起原乎六藝騷人之後風流彌劬漢氏中葉稍革古制藻絢交錯支派逾廣英才間出衆體互興分鑣並驅因

枝振葉故子雲有鞏悅之說蕭統興推輪之嘆而沿襲
或異意制橫作習尚殊軌氣韻相高沈約有云自漢至
魏四百載間文體三變自是而下豈勝道哉繇靈均以
來迄于五代屬辭之士連衡接武咸用全次以備夫廣
記云

屈原名平楚之同姓也為懷王左徒王甚任之上官大
夫害其能讒之王怒而疏平故平憂愁幽恚作離騷離
騷者猶離憂也又有賦二十五篇

唐勒楚大夫有賦四篇

宋玉楚大夫有賦十六篇

宋玉唐勒景差之徒在屈原後皆好辭而以賦見稱然皆

祖屈原之從容辭令

荀卿賦十篇

荀卿趙人齊襄王時荀卿最為老師三為祭酒後適楚為蘭陵令避漢宣帝名改為

孫卿

漢陸賈楚人為大中大夫有賦三篇

朱建楚人高祖賜號平原王有賦一篇

莊夫子名忌吳人有賦二十四篇

賈生名誼為中大夫天子議以任公卿之位絳灌東陽
侯馮敬之屬盡害之乃以賈生為長沙王太傅賈生既
辭任意不自得及渡湘水為賦以弔屈原後三年有鵠
飛入賈生舍止於坐隅楚人命鵠曰服賈生既以謫居
長沙長沙卑隲自以為壽不得長傷悼之乃為賦自廣

一云有
賦六篇

韋孟家本彭城為楚元王傅傅子夷王及孫王戊

官為
楚王

傳而歷相
三王也

不遵道孟作詩諷諫後遂去位徙家於鄢又

作鄒詩

孔臧為太常有賦二十篇

吾丘壽王字子贛趙人為光祿大夫有賦十五篇

蔡邕賦一篇

吏闕官

倪寬千乘人為御史大夫有賦二篇

張子僑為光祿大夫有賦三篇

莊忽奇為常侍郎有賦十一篇

七略云忽奇者或言莊
夫子族家子或言莊助

弟此

朱買臣字翁子吳人為丞相長史有賦三篇

司馬遷字子長為太史公有賦八篇

蘓李為遼東太守有賦二篇

蕭望之字長倩東海人為前將軍輔政有賦一篇

徐明字長君為河內太守有賦三篇

李息為給事黃門侍郎有賦九篇

馮商有賦九篇

杜參為長社尉有賦二篇

張豐字僑子為車郎有賦三篇

朱宇為驃騎將軍有賦三篇

一云朱宇為驃騎將軍史

李思有孝景皇帝頌十五篇

李忠為衛士令有賦二篇

賈偃賦二篇

賈充賦四篇

張仁賦六篇

秦充賦二篇

李步昌賦二篇

謝多為侍郎有賦十篇

周長孺為平陽公主舍人有賦二篇

華錡賦九篇

睦弘賦一篇

即睦孟也以明經為議郎

別相陽賦五篇

王商為黃門書者假史有賦十三篇

徐博為侍中有賦四篇

王廣為黃門書者作呂嘉賦五篇

華龍為漢中都尉丞有賦二篇

路恭為左馮翊史有賦八篇

東方朔字曼倩平原厭次人為常侍郎久之朔上書陳
農戰疆國之計因自頌獨不得大官欲求試用數萬言
終不見用朔因著論設客已用位卑以自慰諭又設非
有先生論此二篇最善其餘有封泰山責和氏璧及皇
太子生禱祝屏風殷上柏柱平樂觀獵賦八言七言上

下八言七言詩各有上下篇從公孫弘借車凡劉向所錄朔書具是

矣

劉向別錄所載

枚乘字叔淮陰人景帝時召拜弘農郡都尉以病去官復游梁梁客皆善屬辭賦乘尤高孝王薨乘歸淮陰有賦九首

枚臯字少孺乘之子也上書北闕自稱枚乘之子武帝得之大喜召入見侍詔使賦平樂觀善之拜為郎武帝春秋二十九乃得皇子羣臣喜故臯與東方朔作皇子

生賦初銜皇后立臯奏賦以戒終臯為賦善於朔也從
行至甘泉雍河東東巡狩封泰山塞決河宣房游觀三
輔離宮館臨山澤弋獵射馭狗馬蹴鞠刻鏤上有所感
輒使賦之奉詔輒成臯自言為賦不如相如又言為賦
乃俳見視如倡自悔類倡也故其賦有詆嫫東方朔又
自詆嫫其文骯骯曲隨其事皆得其意頗詼笑不甚閑
靡凡可讀者百二十篇其尤嫚戲不可讀者尚數十篇
司馬相如字長卿蜀郡成都人為武騎會景帝不好辭

賦是時梁孝王來朝從游說之士齊人鄒陽淮陰枚乘

吳嚴忌夫子之徒

嚴忌本姓莊當時尊上號曰夫子史家避漢明帝諱故遂為嚴耳

相

如見而說之因病免客游梁得與諸侯游士居數歲乃

著子虛之賦以子虛虛言也為楚稱

稱說楚之美也

烏有先生

者烏有此事也為齊難亡是公者亡是人也

亡讀無欲明

天子之義故虛藉此三人為辭

藉假也

以推天子諸侯之

苑囿其卒章歸之於節儉因以風諫上林賦亡是公言

上林廣大山谷水泉萬物及子虛言雲夢所有甚衆侈

靡多過其實且非義理所止故刪取其要歸正道而論

之

言不尚其侈靡之論且取終篇歸於正道且非除其辭也矣

武帝既美子虛之事

相如見武帝好僂因曰上林之事未足美也尚有靡者

臣嘗為大人賦未就請具而奏之相如以為列僂之儒

居山澤間

儒有道術之稱也凡有道術皆為儒

形容甚臞

臞瘠也音年切又音衙

此

非帝王之僂意也乃遂奏大人賦既奏武帝大悅飄飄

有凌雲氣游天地間之意武帝過宜春宮相如又奏賦

以哀二世行失相如後為孝文園令病免家居茂陵天

子曰司馬相如病甚可往從悉取其書若後之矣

若汝也言

汝今去已
在他人後

所忠往

所忠使者
姓名也

而相如已死家無遺書問

妻對曰長卿未嘗有書也時時著書人又取去長卿未
死時為一卷書曰有使來求書奏之其遺札書言封禪
事所忠奏焉天子異之相如他所著遺平陵侯書與五
公子相難草木書篇不采采其尤著公卿者

王褒字子淵蜀人也有才俊益州刺史王襄欲宣風化
於衆庶間請與褒相見使褒作中和樂職宣布詩又作

其傳因奏褒有軼才宣帝徵褒詔褒為聖主得賢臣頌
帝令褒與張子僑等並待詔所幸宮館輒為歌頌頌之
擢褒為諫大夫元帝為太子喜褒所為甘泉及洞簫賦
令後宮誦讀之

韋玄成字少翁丞相賢子襲封扶陽侯以列侯侍祀孝
惠廟當晨入廟天雨淖不駕馬車而騎至廟下有司
劾奏等輩數人皆削爵為關內侯玄成自傷貶黜父爵
嘆曰吾何面目以奉祭祀作詩自劾責元帝永光中代

于定國為丞相貶黜十年之間遂繼父相位封侯故國
榮當世焉玄成復作詩自著復玷缺之難因以戒示

子孫

揚雄字子雲蜀郡成都人雄好辭賦先時蜀有司馬相
如賦甚弘麗雄每作賦嘗擬之以為式又作書撫離騷
文而反之自岷山投諸江流以弔屈原名曰反離騷又
作廣騷畔牢愁孝成帝時有薦雄文似相如者召雄待
詔承明之庭從上甘泉還奏甘泉賦帝祭后土又奏河

東賦嘗從羽獵又奏羽獵賦拜為郎明年又奏長楊賦
雄方草太玄或嘲雄以玄尚白而玄解之曰解嘲雄實
好古而樂道其意欲求文章成名於後世以為箴莫善
於虞箴作州箴九州之箴也賦莫深於離騷反而廣之辭莫
麗於相如作四賦皆斟酌其本相與放依而馳騁云其
後雄以為賦者將以風之必推類而言極麗靡之辭閱
侈鉅行競於使人不能加也既乃歸之於正然覽者已
過矣往時武帝好神仙相如上大人賦欲以諷帝及飄

飄有凌雲之志繇是言之賦勸而不止明矣又頗似俳
優淳于髡優孟之徒非法度所存賢人君子賦詩之正
也於是輟不復為

薛方字子容齊人嘗為郡掾祭酒王莽時居家以經教
授喜屬文著詩賦數十篇

後漢班彪扶風人更始敗隗囂擁衆天水彪從之彪傷
方難乃著王命論以為漢德承堯有靈命之符王者興
祚非詐力所致囂終不寤遂避地河西河西大將軍竇

融以為從事及融徵還京師光武問曰所上章奏誰與
參之對曰皆從事班彪所為後為望都長建武三十年
卒著賦論書記奏事合九篇

桓譚字君山沛國人博學多通能文章為議郎給事中
出為六安郡丞道病卒所著賦誄書奏凡二十六篇

田邑字伯玉馮翊人有大節涉學藝能善屬文為漁陽
太守

王隆字文山馮翊人建武中為新汲令能文章所著詩

賦銘書凡二十六篇

杜篤字季雅京兆人少博學居美陽與美陽令相恨令
怨收篤送京師會大司馬吳漢堯光武詔諸儒誅之篤
於獄中為誄辭最高帝美之賜帛免刑篤以關中表裏
山河先帝舊京不宜改營雒邑乃上奏論篤賦所著賦
誄弔書讚七言女誡及雜文凡十八篇又著明世論十
五篇後車騎將軍防擊西羌請篤為從事中郎戰沒
史岑字子孝沛國人王莽末以文章顯莽以為謁者著

頌誄復神說疾凡四篇

岑一字孝山
作出師頌

崔篆涿郡人王莽以為新建大尹稱疾去建武初客居
滎陽臨終作賦以自悼名曰慰志

梁竦字叔敬松弟也明帝永平中坐松事徙九真南歷
江湖濟沅湘感悼子胥屈原以非辜沈身乃作悼騷賦
繫玄石而沈之後辟命交至並無所就

賈逵字景伯扶風平陵人永平中有神雀集宮殿官府
翹羽有五采色帝異之以問臨邑侯劉復復不能對薦

達博物多識帝乃召見達問之對曰昔武王終父之業
鶻鶻在岐宣帝威懷戎狄神雀仍集此胡降之徵也帝
勅蘭臺給筆札使作神雀頌拜為郎後為魯相所作詩
頌誅書連珠酒令凡九篇

班固字孟堅彪子也弱冠而孤作幽通賦以致命遂志
永平中為郎典校祕書時京師修起宮室濬繕城隍而
關中耆老猶望朝廷西顧固感前世相如壽王東方之
徒造構文辭終以諷勸乃上兩都賦盛稱雒邑制度之

美以折西賓淫侈之論固所著典引賓戲應讖詩賦銘
誄頌書文記議六言在者凡四十一篇

傳毅字武仲扶風人明帝永平中於平陵習章句因作
迪志詩章毅以帝求賢不篤士多隱處故作七激以為
諷建初中章帝博召文學之士以毅為蘭臺令史拜郎
中與班固賈逵共校書毅追美孝皇帝功德最盛而廟
頌未立乃依清廟作顯宗頌十篇奏之毅早卒著詩賦
誄頌祀文七激連珠凡二十八篇

馮衍字敬通京兆杜陵人幼有奇才為曲陽令得罪西歸故郡衍不得志退而作賦自勵命其篇曰顯志顯志者言光明之情昭章玄妙之思也居貧年老卒於家所著賦誄銘問交德誥慎情衍集有問交一篇慎情一篇書記說自序官錄策五十篇章帝甚重其文

王景字仲通樂浪人建初七年為徐州刺史先是杜陵杜篤奏上論遷都賦欲令車駕還遷長安者老聞者皆動懷土之心莫不眷然仲立西望舊京以宮廟已立恐

人情疑惑會時有神雀諸瑞乃作金人論頌雒邑之美

崔駰字季伯篆孫也善屬文嘗以典籍為業未遑仕進

之事時人或譏其太玄靜將以後名失實駰擬揚雄解

嘲作達旨以答焉

華嶠曰駰譏揚雄以為范蔡鄒行之徒乘蒙相傾詎曜諸侯者也而云波

我異尚又曰竊資卓氏割炙細君斯蓋士之贅行而云不能與此數公者同以為失類而改之也元和

中章帝始修古禮巡狩方岳駰上四巡頌以稱漢德辭

甚典美為竇憲主簿出為長岑長以遠去不之官而歸

和帝永元中卒所著詩賦銘頌書記表七依婚禮結言

達旨酒警合二十一篇

崔瑗字子玉駟子也為濟北相卒瑗高於文詞尤善為

書記箴銘所著賦碑銘箴頌七蘇

牧乘七發之流

南陽文學官

志嘆辭移社文悔祈草書執七言凡五十七篇其南陽文學官志稱於後世諸能為文者皆自以弗及

崔烈有文才所著詩書教頌等凡四篇位至太尉

崔實字子真一名台字元始為尚書病卒所著碑論箴

銘答七言詞文表記書凡十五篇

李尤字伯仁廣漢人少以文章顯和帝時侍中賈逵薦尤有相如揚雄之風召詣東觀受詔作賦拜蘭臺令史累遷樂安相卒所著詩賦銘誄頌七嘆哀典凡二十八篇

李漢廣漢人有文才為東觀郎著賦誄頌論數十篇

桓麟郁孫也為許令卒著誄讚說書凡二十篇

摯虞文章志麟

文在者十八篇有碑九首誄七首說一首沛相郭府君書一首

桓彬字彦林麟子也為尚書郎卒於家所著七說及書

凡三篇

朱穆字公叔南陽人嘗感時澆薄慕尚敦篤乃作崇厚論又著廣絕交論亦矯時之作後為尚書卒所著論策

奏教書詩記嘲凡二十篇

穆著論甚美蔡邕嘗至其家自寫之

張衡字平子南陽人少善屬文和帝永元中天下承平日久自王侯以下莫不踰侈衡乃擬班固兩都作二京賦因以諷諫精思傳會十年乃成順帝初為太史令衡不慕當世所居之官輒積年不徙自去史職五載復還

乃設客問作應問以見其志遷侍中中官共讒之衡嘗
思圖身之事以為吉凶倚伏幽微難明乃作思玄賦以
宣寄情志後為尚書卒所著詩賦銘七言靈憲應問七

辨巡詰懸圖凡三十二篇

衡集作玄圖
蓋懸與玄通

葛龔字元甫梁國寧陵人也和帝時以善文記知名著
文賦碑誄書記凡二十篇終臨汾令

胡廣字伯始南郡華容人為太傅錄尚書令薨初揚雄
依虞箴作十州二十五官箴其九箴亡闕後涿郡崔駰

及子瑗及臨邑侯劉駒餘增補十六篇廣復繼作四篇
文甚典美乃悉撰次首目為之解釋名曰百官箴凡四
十八篇其餘所著詩賦銘頌箴弔及諸解詁凡二十二
篇

夏恭字敬公梁國蒙人為太山郡尉卒官恭為文著善
賦頌詩勵學凡二十篇恭子牙少習家業著賦頌讚誄
凡四十篇舉孝廉早卒

蘇順字孝山京兆人和安間以才學見稱為郎中卒官

所著賦論誄哀辭雜文凡二十六篇時三輔多士扶風
曹衆伯師亦有才學著誄書論四篇又有曹朔不知何
許人作漢頌四篇

劉珍一名竇南陽人安帝延光五年為衛尉卒官著誄
頌連珠凡七篇

黃香字文彊能文章為魏郡太守卒官著賦牋奏書令
凡五篇

馬融字季長有俊才安帝永初四年為校書郎中是時

鄧太后臨朝鄧騭兄弟輔政以為文德可興武功宜廢
遂廢蒐狩之禮初元二年乃上廣成頌以諷出為河間
王廐長史時車駕東巡岱宗融上東巡頌帝奇其文召
拜郎中桓帝延熹九年卒年八十八所著賦頌碑誄書
記表奏七言琴歌對策遺令凡二十一篇

崔琦字子璋涿郡人少游學京師以文章博通稱舉孝
廉梁冀聞其清與交琦作外戚箴以戒之琦以言不從
失意復作白鵠賦以為風後為冀殺之所著賦頌銘誄

箴弔論九咨七言凡十五篇

王逸字叔師順帝時為侍中著賦誄書論及雜文凡二十一
十一篇又作漢詩凡一百二十三篇

王延壽字文考逸之子也有雋才少游魯國作靈光殿賦後蔡邕亦造此賦未成及見延壽所為甚竒之遂輟翰而已曾有異夢意惡之乃作夢賦以自勵後溺水死邊讓字文禮陳畱人少辯博能屬文作章華賦雖多淫麗之辭而終之以正亦如相如之諷也位至九江太守

邊韶字孝先陳留人以文學知名為陳相卒於官著詩
頌碑銘書策五十篇

趙壹恃才倨傲屢抵罪幾致死友人救得免壹乃貽書
謝恩及為窮鳥賦又作刺世疾邪賦著賦頌箴誄書及
雜文十六篇壹十辟公府竝不就終於家

張升字彥真尉氏人為外黃令著賦誄頌碑書凡十六
篇

侯瑾字子瓏燉煌人州郡累召公車有道徵並稱疾不

到作矯世論以譏刺當世而徙入山中單思著述以莫知於世故作應時賓難以自寄餘所作雜文數十篇多亡矣西河人敬其才而不敢名之皆稱為侯君

劉梁字曼山一名岑東平人少孤貧嘗疾世多利交以邪曲相黨乃著破羣論時之覽者以為仲尼作春秋亂世知志今此論之作俗士豈不愧心又作辨和同之論為尚書郎累遷野王令未行病卒

蔡邕字伯喈陳留圉人少博學好辭章閒居翫古不交

當世感東方客難及揚雄班固崔駰之徒設疑以自通
乃斟酌羣言疑其是而矯其非作釋誨以戒勵後為左
中郎將邕著詩賦碑誄銘讚連珠箴弔論議獨斷勸學
釋誨叙樂女訓篆執祝文章表書記凡四百篇傳於世
仲長統字公理山陽人博涉書記膽於文辭後叅丞相
曹操軍事卒統友人東海繆襲嘗稱統文章足當西京
董賈劉揚

楊修字德祖有俊才為丞相曹公主簿所著賦頌碑讚

詩哀辭表記書凡十五篇

禰衡字正平原人少有才辨曹公送與劉表表及荊州士大夫先服其才名甚賓禮文章言議非衡不定表嘗與諸文人共草章奏並擇其才思時衡出還見之開省未周因毀以抵地表慙然為駭衡乃從求筆札須臾立成辭義可觀表大悅益重之後復侮慢於表表耻不能容以江夏太守黃祖性急故送衡與之祖亦善待焉衡為作書記輕重踈密各得體宜祖持其手曰處士此

正得祖意如祖腹中之所欲言也祖長子射為章陵太守嘗大會賓客人有獻鸚鵡者黃祖舉庖於衡曰願先生賦之以娛嘉賓衡覽筆而作文無加點辭采甚麗後為祖所殺

張超字子並河間人留侯良之後有文才靈帝時從車騎將軍朱儁征黃巾為別部司馬著賦頌碑文薦檄牋書碣文嘲凡十九篇

高彪字子義吳郡人除郎中校書東觀數奏賦頌奇文

因事諷諫靈帝異之時京兆第五永為督軍御史使督
幽州百官大會祖餞於長樂觀議郎蔡邕等皆賦詩彪
乃獨作箴邕等甚美其文以為莫尚也出為內黃令卒
於官文章多亡

張奐字然明酒泉人後為弘農人為太常以黨罪歸田
里卒所著銘書教誡述志對策章表二十四篇

李固字子堅漢中人為太尉所著章表奏議教令對策
記銘凡十一篇

延篤字叔堅南陽人為京兆尹以病免歸卒于家所著詩論銘書應訊表教令凡二十篇

應奉字世叔汝南人為司隸校尉及黨事起奉乃慨然以疾自退追愍屈原因以自傷著感騷三十篇數萬言盧植字子幹涿郡人為北中郎將免官隱於上谷卒所著碑誄表記凡六篇

陶邱洪字子休平原人清達博辨文冠當代辟太尉府卒

皇甫規字威明安定朝那人為護羌校尉以疾卒所著
賦銘碑讚禱文弔章表教令書檄牋記凡二十七篇
魏孔融字文舉魯國人為少府所著詩頌碑文論議六
言策文表檄教令書記凡二十五篇

王粲字仲宣山陽高平人為太祖軍謀祭酒魏國建為
侍中粲善屬文舉筆便成無所改定時人常以為宿構

然正復精意單思亦不能加也

粲才既高辨論應幾鍾
繇王朗等雖名為魏卿

相至於朝廷奏議
皆捫筆不能措手

著詩賦論議垂六十篇

徐幹字偉長北海人陳琳字孔璋廣陵人阮瑀字元瑜

陳留人應瑒字德璉汝南人劉楨字公幹東平人幹為

司空軍謀祭酒掾屬五官將文學琳瑀為司空軍謀祭

酒管記室軍國書檄多琳瑀所作也琳徙門下督瑀為

倉曹掾屬瑒楨並為太祖丞相掾咸著文賦數十篇魏文

帝典論曰魏世文人魯國孔融廣陵陳琳山陽王粲北

海徐幹陳留阮瑀汝陽應瑒東平劉楨斯七子者於學

無所遺於辭無所假粲長於辭賦幹時有逸氣然非粲

匹也如粲之初征登樓槐賦征思幹之玄援漏卮圖扇

橘賦雖張蔡不過也然於他文未能稱是琳瑀之章表

書記今之偶也應瑒和而不壯劉楨壯而不密孔融體

氣高妙有過人者然不能持論理不勝辭至于雜以嘲戲乃其所善揚班之偶也自潁川邯鄲淳繁欽陳留路粹沛國丁儀丁廙弘農楊修河內荀綽等亦有文采而不在此七人之列瑒弟璩璩子貞威以文章顯

邯鄲淳一名竺字子叔潁川人博學有文章黃初中為博士給事中作投壺千餘言奏之文帝以為工賜帛千疋

繁欽字休伯以文才機辯少得名於汝潁欽既長於書記又善為詩賦其所與太子書說喉轉意率皆巧麗為丞相主簿卒

夏侯會字雅權幼以才學見稱善屬文議終樂安太守
與陳郡太守任城孫該郎中令河東杜摯等並著文賦
頗傳於世

韋誕字仲將太僕端之子終光祿大夫有文才善屬辭
章

劉劭字孔才廣平人為散騎常侍嘗作趙都賦明帝美
之詔劭作許都雒都賦時外典軍旅內營宮室劭作二
賦皆諷諫焉

衛覲字伯儒河東人少夙成以才學稱為尚書凡所撰述數十篇黃初中潘勗王象與覲並以文書顯

潘勗字元茂為尚書左丞魏公九錫策命勗所作也

王象字羲伯黃初時為散騎常侍初建安中與同郡荀緯等俱為魏太子所禮待及王粲陳琳阮瑀路粹等亡後新出之中惟象才最高

吳質字季重濟陰人為北中郎將以文才為文帝所善應璩字休璉博學好屬文善為書記曹爽秉政多違法

度據為詩以諷焉其言雖頗諧合多切時要世共傳之
終於侍中

周不疑年十七著文選論四首

嚴苞黃初中以高才入為祕書丞數奏文賦文帝異之
夏侯玄字太初為太常玄常著樂毅張良及本無肉刑
論辭旨通遠咸傳於世

何晏字平叔為尚書晏少以才秀知名作道德論及諸
文賦著述凡數十篇

袁亮貞固有學行疾何晏鄧颺等著論以譏刺之位至
尚書

劉盛有文藻又善言名理諸所論著並傳於世

鍾會字士季為中書侍郎時司馬景王命中書令虞松
作表再呈不可意命松更定以經時松思竭不能改心
存之形於顏色會察其有憂問松所能松以實答會取
視為定五字松悅服以呈王王曰不當爾邪誰所定也
松曰鍾會向亦欲啟之會公見不敢贅其能王曰如此

可大用可令來

蜀諸葛亮字孔明為丞相亮言教書奏多可觀別為一

集

楊戲字文然犍為人為射聲校尉以後主延熙四年著
季漢輔臣贊其所頌述今多載於蜀書

呂雅為謁者清厲有文才著格論十五篇

郤正字令先河南人弱冠能屬文為祕書郎性澹於榮
利而尤耽意文章自司馬王揚班傳張蔡之儔遺文篇

賦及當世美書善論益部有者則鑽鑿推求略皆寓目
自在內職三十年官不過六百石依則先儒假文以見
意號曰釋譏其文繼於崔駰達旨景耀六年後主從譙
周之計遣使請降於鄧艾其書正所造也凡所著述詩
論賦之屬垂百篇

秦宓字子勅廣漢人少有才學為大司農卒宓見帝系
之文五帝皆同一族宓辯其不然之本論皇帝王霸養
龍之說甚有通理譙允南少時數往諮訪記錄其言於

春秋然否論

譙周字允南巴西人為中散大夫太子家令于時軍旅數出百姓彫瘁周與尚書令陳祗論其利害退而書之謂之仇國論

陳術字申伯漢中人博學多聞著釋論七篇歷三郡太守

吳張紘字子綱廣陵人為大帝長史見柙楮枕愛其文為作賦陳琳在北見之以示人曰此吾鄉里張子綱所

作也後絃見陳琳作武庫賦應譏論與琳書深嘆美之
琳答曰自僕在河北與天下隔此間率少於文章易為
雄霸故使僕受此過差之譚非其實也今景興魏王朗
字景興
在此足下與子布吳張昭
字子布在彼所謂小巫見大巫神氣
盡矣絃著詩賦銘誄十餘篇

胡綜字偉則汝南固始人也為建武中郎將黃武八年
夏黃龍見舉口於是大帝稱尊號因瑞改元又作黃龍
大牙樹在中軍諸軍進退視其所向命綜作賦後為偏

將軍凡自大帝統事諸為文誥策命鄰國書符略皆綜之所造也

薛綜字敬宗沛郡人少善屬文有秀才為太子少傅領選曹尚書赤烏六年卒凡所著詩賦難論數萬言名曰私載子瑩建衡中為選部尚書領太子少傅後主追嘆綜遺文且命瑩繼作瑩遂獻詩

張昭字子布彭城人少好學時汝南主簿應劭議宜為舊君諱論者互有異同著論州里才士陳琳等皆稱善


之

嚴峻字曼才彭城人少耽學為尚書令卒峻著孝經傳
潮水論又與裴玄張承論管仲李路皆傳於世

孫丞好學有文章作螢火賦行於世

范慎字孝敬廣陵人為太子登賓客著論二十篇名曰
矯非後為太尉終

韋曜字弘嗣吳郡人少好學能屬文為太子中庶子時
蔡穎亦在東宮性好博奕太子和以為無益命曜論之



冊府元龜卷八百三十七

欽定四庫全書

子部

冊府元龜卷八百

三十八至
四十一

詳校官中書臣孫球

侍讀臣孫球覆勘

總校官庶吉士臣何思鈞

校對官庶吉士臣潘庭筠

謄錄監生臣馮曰琮

欽定四庫全書

冊府元龜卷八百三十八

宋 王欽若等 撰

總錄部

文章第二

晉阮籍字嗣宗陳留尉氏人在魏為步兵校尉會文帝
讓九錫公卿將勸進使籍為其辭籍沉醉忘作臨詣府
使取之見籍方據按醉眠使者告籍使書按使寫之無
所改竄辭甚清壯為時所重籍嘗登廣武觀楚漢戰處

嘆曰時無英雄使豎子成名登武牢山望京邑而嘆於是賦豪傑詩陳留王景元四年卒嗣宗能屬文初不留思作詠懷詩八十餘篇為世所重著達莊論叙無為之貴文多不錄籍嘗於蘇門山遇孫登遂著大人先生傳嵇康字叔夜譙人為中散大夫著養生論君子無私論康能屬文撰上古以來高士為之傳贊欲友其人於千載也又作太師箴亦足以明帝王之道焉復作聲無哀樂論甚有條理康所著諸文論六七萬言皆為世所玩

何劭字敬祖為僕射遷司徒劭博學善屬文撰荀粲王弼傳及諸奏議文章並行於世

張華字茂先范陽人學業優博辭藻溫麗初未知名著鷦鷯賦以自寄陳留阮籍見之歎曰王佐之才也後為尚書當時詔誥皆所草定惠帝時為侍中中書監華懼后族之盛作女史箴以為諷華所著文章並行於世

傅玄字休奕北地人善屬文為司隸校尉卒文集百餘卷行於世

傅咸字長虞玄子為司隸校尉好屬文論雖綺麗不足而言成規鑒潁川庾純嘗歎曰長虞之文近乎詩人之作矣

傅祗字子莊咸從父弟也後為司徒著文章駁論十餘萬言

傅暢祗子也為秘書丞作晉諸公叙讚二十二卷又為公卿故事九卷

樂廣字彥輔南陽人為太子中庶子遷侍中河南尹廣

善清言而不長於筆將讓尹請潘岳為表岳曰當得君
意廣乃作二百句語述已之志岳因取次比便成名筆
時人咸云若廣不假岳之筆岳不取廣之旨無以成斯
美也

索靖字幼安燉煌人為游擊將軍領雍秦涼義兵與賊
戰被傷卒撰晉詩二十卷

華譚字令思廣陵人為鄆城令過濮水作莊子贊以示
功曹而廷掾張延為答教其文甚美

向秀字子期與嵇康為竹林之游又共呂安灌園於山陽康被誅秀應本郡計入雒秀自此行作思舊賦後為散騎常侍卒

阮修字子宣性簡狂不修人事所著述甚寡嘗作大鵬贊後為太子洗馬

應貞字吉甫少以才聞魏正始中夏侯玄盛有名勢貞在玄坐作五言詩玄嘉玩之武帝踐祚為給事中帝於華林園宴射貞賦詩最美後遷散騎常侍卒文集行於

世

庾敳字子高為陳留相敳見王室多難終知嬰禍乃著
意賦以豁情猶賈誼之鵬鳥也

劉實字子貞為吏部郎參文帝相國軍事以多進趨廉
遜道缺乃著崇讓論以矯之

潘岳字安仁滎陽中牟人夙以才穎見稱辟太尉府舉
秀才泰始中武帝躬耕藉田岳作賦以美其事後為長
安令作西征賦述所經人物山水文清意諧累遷黃門

侍郎既仕宦不達乃作閑居賦以歌事遂情焉岳辭藻絕麗尤善為哀誄之文

皇甫謐字士安安定人沉靜寡欲以著述為務自號玄晏先生著禮樂聖真之論其後鄉人勸令應辟命謐為釋勸論以通志焉武帝咸寧初詔以為太子中庶子又徵為議郎召補著作郎並不應太康三年卒所著詩賦誄頌論難甚多並重於世

摯虞字仲治京兆長安人少事皇甫謐才學通博著述

不倦郡檄主簿虞嘗以死生有命富貴在天天之所祐者義也人之所助者信也履信思順所以延福違此而行所以速禍然道長世短禍福舛錯怵迫之徒不知所守蕩而積忿或迷或放故借之以身假之以事先陳處世不遇之難遂棄彝倫輕舉遠遊以極常人困惑之情而後引之以正反之以義推神明之應於視聽之表重否泰之運於智力之外以明夫任命之不可違故作思遊賦舉賢良為太子舍人除聞喜令時天子留心政道

又吳寇新平天下又安虞上太康頌以美晉德後為太常卿性愛士人有表薦者常為其辭

王蔚河東猗氏人世修儒史之學魏中領軍曹羲作至公論蔚善之而著至機論辭義甚美官至夏陽侯相

王接字祖游蔚子也為臨汾公相國尚書令王堪統行臺上請接補尚書殿中郎未至卒所著雜論議詩賦碑頌駁難十餘萬言喪亂盡失

束皙字廣微陽平人性沉退不慕榮利作玄居賦以擬

容難後為尚書郎卒所著補亡詩文集數十篇行於世
云

盧欽字子若范陽人為尚書僕射領吏部卒所著詩賦
論難數十篇名曰小道子

華嶠字叔駿才學深博為秘書監加散騎常侍所著論
議難駁詩賦之屬數十萬言

華暢嶠少子也有才思所著文章數萬言遭寇亂避難
荊州為賊所害

孫盛字安國太原人為秘書監給事中造詩賦論難數十篇

孫楚字子荆太原中都人才藻卓絕典邁不羣少所推服惟雅敬同郡王濟初楚除婦服作詩以示濟濟曰未知文生於情情生於文覽之悽然增伉儷之重位至馮翊太守

孫綽字興公楚之子博學善屬文少居於會稽遊於山水十有餘年乃作遂初賦以致其意綽絕重張衡左思

之賦每云三都二京五經之鼓吹也常作天台山賦辭
致甚工初成以示友人范滂期云卿試擲地當作金石
聲也滂期曰恐此金石非中宮商然每至佳句輒云應
是我輩語後為廷尉卿領著作綽少以文才推稱於時
文士綽為其冠温王郗庾諸公之薨必須為碑文然後
刊石焉

陸機字士衡吳郡人大司馬抗之少子士衡有異才文
章冠世服膺儒術非禮不動抗卒領父兵為牙門將年

二十而吳滅退居舊里閉門勤學積有十年以孫氏在
吳而祖父世為將相有大勲於江表深慨後王舉而棄
之乃論大帝所以得後主所以亡又欲述其祖父功業
遂作辨亡二篇入雒果遷中書郎齊王冏既矜功自伐
受爵不讓機惡之作豪士賦以刺又以聖王經國義有
封建因採其遠指著五等論後成都王穎表為平原內
史機天才秀逸辭藻宏麗張華常謂之曰人之為文常
恨才少而子更患其多弟雲常與書曰君苗見兄文輒

欲燒其筆硯後葛洪著書稱機雲猶玄圃之積玉無非
夜光馬五河之吐流泉源如一焉其宏麗妍贍英銳飄
逸亦一代之絕手其為人所推服如此所著文章凡三
百餘篇並行於世

陸雲字士龍士衡弟也清正有才理入雒累遷中書侍
郎成都王穎表為清河內史與士衡同遇害所著文章
三百四十九篇又撰新書十篇並行於世

陸喜字恭仲士衡從父兄在吳為吏部尚書博學有才

思常為自叙曰余讀幽通思玄四愁而作娛賓九思又作西州清論傳於世

文立字廣休巴郡人為衛尉卒所著章奏詩賦數十篇行於世

成公綏字子安少有俊才詞賦甚麗閒默自守不求聞達時有孝烏每集其廬舍綏為有反哺之德以為祥禽乃作賦美之又以賦者貴能分賦物理敷演無方天地之盛可以致思矣歷觀古人未之有賦豈獨以至麗無

文難以辭贊不然何其闕哉遂為天地賦又雅好音律
常當暑承風而嘯冷然成曲因為嘯賦張華推重綏每
見其文歎服以為絕倫薦之太常徵為博士歷遷中書
郎每與華受詔並為詩賦年四十三卒所著賦雜筆十
餘卷行於世

左思字太冲齊國人辭藻壯麗造齊都賦一年乃成復
欲賦三都會妹芬入宮移家京師乃詣著作郎張載訪
岷邛之事遂構思十年門庭藩溷皆著紙筆過得一句

即便疏之自以所見不博求為秘書郎及賦成時人未
之重思自以其作不讓班張恐以人廢言安定皇甫謐
有高譽思造而示之謐稱善為其賦序張載為注魏都
劉達注吳蜀而序之陳留衛瓘又為思賦作畧解自是
之後盛重於時司空張華見而歎曰班張之流也使讀
之者盡而有餘久而更新於是豪貴之家競相傳寫雒
陽為之紙貴初陸機入雒欲為此賦聞思作之撫掌而
笑與弟雲書曰此間有儉父欲作三都賦須其成當以

覆酒瓮耳思賦出機絕嘆伏以為不能加也遂輟筆焉
鄒湛字潤甫南陽人為少府卒所著論事議二十五首
為時所重

棗據字道彥潁川人善文辭為太子中庶子卒所著詩
賦論四十五首遇亂多亡失子腆字玄方為襄城太守
亦以文章顯腆弟嵩字臺產才藝尤美為散騎常侍

張載字孟陽安平人父叔蜀郡太守載性閒雅博學有
文章太康初至蜀省父道經劔閣載以蜀人恃險好亂

因著銘以作誠益州刺史張敏見而竒之乃表上其文
武帝遣使鐫之於劔閣山又為權論及濛汜賦司隸校
尉傅玄見而嗟嘆以車迎之言談盡日為之延譽遂知
名起家著作佐郎

張協字景陽載弟也少有雋才為河間內史棄絕人事
屏居草澤守道不競擬諸文士作七命世以為工永嘉
初徵為黃門侍郎不就終於家

王沉字彥伯少有俊才出於寒素不能隨俗浮沉為時

豪所抑仕郡文學掾鬱鬱不得志及作釋時論是時王政陵遲官才失實君子多退而窮處遂終於里閭惠帝元康初為松滋令

吳郡蔡洪字叔開有才名作孤奮論與釋時意同讀之者莫不嘆息焉

潘尼字正叔岳之從子少有清才與岳俱以文章見知性靜退不競惟以勤學著述為事著安身論以明所守元康初為太子舍人上釋奠頌後為著作郎為乘輿箴

夏侯湛字孝若譙國人幼有盛才文章宏富善構新詞
為郎中累年不調乃作抵疑以自廣又作昆弟論後為
散騎常侍卒著論三十餘篇別為一家之言初湛作周
詩成以示潘岳岳曰此文非徒溫雅乃別見孝悌之性
岳因此遂作家風詩

劉琨字越石中山人年二十六為司隸從事時征虜將
軍石崇河南金谷澗中有別廬冠絕時輩引致賓客日
以賦詩琨預其間文詠頗為當時所許後為司空都督

并幽冀三州諸軍事

歐陽建字堅石為馮翊太守為孫秀所害時人莫不悼惜之臨命作詩甚哀楚

江統字應元陳留人為山陰令時關隴屢為氐羌所擾孟觀西討自擒氐帥齊萬年統深惟四夷亂華宜杜其萌乃作徙戎論後為愍懷太子洗馬及太子之薨改葬統作誄叙哀為世所重後為散騎常侍領國子博士卒凡所造賦頌表奏皆傳於世

江道字道載陳留人為太常病卒著阮籍序贊逸士箴及詩賦奏議數十篇行於世

李賜字宗石隄為人少能屬文嘗為玄鳥賦詞甚美州辟別駕舉秀才未行而終

李興字雋石賜弟也亦有文才為鎮南將軍劉宏參軍宏立諸葛孔明羊叔子碑使興為之文甚有辭理

范堅字子嘗博學善屬文懷帝永嘉中避亂江東拜著作郎堅子啓終於黃門侍郎父子並有文筆傳於世

郭象字子玄少有才理常閒居以文論自娛後為太傅主簿永嘉末病卒著碑論十二篇

張翰字季鷹吳郡人有清才善屬文為齊王大司馬東曹掾翰因見秋風起乃思吳中菰菜蓴羹鱸魚膾遂命駕而歸著首丘賦後卒其文筆數十篇行於世

郭璞字景純河東人好經術博學有高才而訥於言論詞賦為中興之冠著江賦其詞甚偉為世所稱後復作南郊賦元帝見而嘉之以為著作佐郎璞既好卜筮摺

紳多笑之又自以才高位卑乃著客傲後為王敦記室
參軍為敦所害所作詩誄頌賦亦有數萬餘言

王鑿字茂宣高堂邑人也少以文筆著稱中興為永興
令大將軍王敦請為記室參軍未就而卒時年四十一
文集傳於世鑿弟濤及弟子戲並有才筆

葛洪字稚川丹陽人少好學凡所著撰皆精覈是非而
才章富膽初為王導諮議參軍選為散騎常侍領大著
作不就求為句漏令至廣州止羅浮山在山積年優游

閒養著述不輟所著碑誄詩賦百卷移檄章表三十卷
洪博聞深洽江左絕倫著述篇章富於班馬又晉陵內
史張闓立曲阿新豐塘溉田每歲豐稔洪為其頌

庾闡字仲初潁川人為散騎常侍領大著作出補零陵
太守入湘川以吊賈誼徵為給事中吳國內史虞潭為
太伯立碑闡製其文又作揚都賦為世所重著詩賦銘
頌十卷行於世

曹毗字輔佐譙國人少好文籍善屬辭賦郡察孝廉除

郎中蔡謨舉為著作佐郎後為太學博士時桂陽張碩
為神女杜蘭香所降毗因以二篇詩嘲之并續蘭香歌
詩十篇甚有文彩又著揚都賦亞於庾闡累遷尚書郎
鎮東大將軍從事中郎下邳太守以名位不至著對儒
以自釋累遷至光祿勳卒凡所著文章十五卷傳於世
李克字宏度江夏人為丞相王導記室參軍充幼好刑
名之學深抑虛浮之士嘗著學箴為中書侍郎為釋莊
論上下二篇詩賦表頌等雜文二百四十首行於世

顧愷之字長康晉陵人博學有才氣嘗為箏賦成謂人曰吾賦之比嵇康琴不賞者必以後出相遺深識者亦當以高竒為貴為散騎常侍卒於官所著文集及啓蒙記行於世

虞預字叔寧徵士喜之弟也少好學有文章為散騎常侍領著作卒於家所著詩賦碑誄論數十篇

虞溥字允源高平人為鄱陽內史著文章詩賦數十篇卒於雒

謝沈字行思山陰人為著作郎卒所著述及詩賦文論
皆行於世其才學在虞預之右

紀瞻字思遠丹陽人元帝時為驃騎將軍散騎常侍瞻
才兼文武好讀書凡所著述詩賦牋表數十篇

嵇含字君道紹從子也好學能屬文為郎中時宏農王
粹以貴公子尚主館宇甚盛圖莊周於室廣集朝士使
含為之讚含援筆為弔文文不加點

袁喬字彥叔陳郡人為江夏相龍驤將軍喬博學有文

才諸文筆皆行於世

楊方字公回少好學有異才初為郡令少威儀鄉邑未
之知內史諸葛恢見而器之恢嘗遣方為文薦郡功曹
主簿虞預稱美之送以示賀循報書曰此子開拔有志
意只言異於凡猥耳不圖偉才如此其文甚有奇芬若
出其胸臆乃是一國所推豈但牧豎中逸羣邪後為司
徒參軍事出為高梁太守著文筆皆行於世

王廙字世將丞相導從弟廙少能屬文元帝鎮江左為

寧遠將軍荊州刺史及帝即位奏中興頌

張伉字季陽協弟也中興初散騎常侍領著作佐郎述
歷贊一篇

謝萬字萬石安弟也工言論善屬文叙漁父屈原季主
賈誼楚老龔勝孫登嵇康四隱四顯為八賢論

蔡謨字道明陳留人為司徒卒所著文筆論議有集行
於世

王坦之字文度湛曾孫也為侍中領左衛將軍坦之有

風格尤非時俗放蕩不敦儒教頗尚刑名學著廢莊論
坦之又嘗與殷康子書論公謙之義康子及表宏並有
疑難坦之標章摘句一一申而釋之莫不厭服

孔嚴著通葛論王坦之與書贊美之位至吳興太守

韓伯字康伯潁川人為侍中王坦之嘗著公謙論表宏
作論以難之伯覽而美其詞旨以為是非既辨誰與正
之遂作辨謙論以行於世

何琦字萬倫司空克之從兄也常以述作為事著三國

評論凡所撰錄百許篇皆行於世歷宣城涇縣令

王羲之字逸少司徒導之從子為右軍會稽內史嘗與同志宴集於會稽山陰之蘭亭羲之自為之序以伸其志或以潘岳金谷詩序方其文羲之比於石崇羲之聞而甚喜

王珣字元琳導孫也為左僕射領太子詹事珣夢人以大筆如椽與之既語人曰此當有大手筆事俄而孝武帝哀冊謚議皆珣所草

桓祕字子穆溫弟也為中領軍免官後起為散騎常侍
不應朝命與謝安書及詩十篇辭理可觀其文多引簡
文帝之眇遇

謝安字安石為吏部尚書中護軍作簡文帝謚議桓溫
嘗以示坐賓曰此謝安石碎金也

袁宏字彥伯侍中猷之孫也父勗臨汝令宏有逸才文
章絕美曾為詠史詩是其風情所寄少孤貧以運租自
業謝尚時鎮牛渚秋夜乘月率爾與左右微服泛江會

宏在舫中諷詠聲既清澈辭又藻拔遂駐聽久之遣問
馬答云是袁臨汝郎誦詩即其詠史之作也累遷大司
馬桓溫府記室溫重其文華專綜書記後為東征賦賦
末列稱過江諸名德而獨不載桓彝時伏滔先在溫府
又與宏善苦諫之宏笑而不答溫知之甚忿而憚宏一
時文宗不欲令人顯問後游青山飲歸命宏同載衆為
之懼行數里問宏云聞君作東征賦多稱先賢何故不
及家君宏曰尊公稱謂非下官敢專既未遑啓不敢顯

之耳溫疑不實乃曰君顯欲為何辭宏答云風鑒散朗
或搜或引身雖可亡道不可隕宣城之節信義為允溫
泣然而止宏賦又不及陶侃侃子胡奴嘗於曲室抽刃
問宏曰家公勲跡如此君賦云何相忽宏窘迫答曰我已
盛述尊公何乃言無因曰精金百汰在割能斷功以濟
時職思靜亂長沙之勲為史所贊湖奴乃止後為三國
名臣頌又從桓溫北征作北征賦皆其文之高者嘗與
王珣伏滔同在桓溫坐溫令滔讀之至聞所傳於相傳

云獲麟於此野誕靈物以瑞德奚授體於虞者疾尼父
之洞泣似實慟而非假豈一性之足傷乃至傷於天下
其本至此便改韻珣云此賦方傳千載無容率爾今於
天下之後移韻徙事然寫送之致似為未盡滔云得益
寫韻一句或為小勝温曰卿思益之宏應聲答曰感不
絕於余心愬流風而獨寫珣誦味久之謂滔曰當今文
章之美故當共推此生後自吏部郎出為東陽郡宏見
漢時傅毅作顯宗頌辭甚典雅乃作頌九章頌簡文之

德上之於孝武卒於東陽有詩賦誄表等雜文凡三百首傳於世

伏滔字玄度平昌人為大司馬桓溫參軍從桓伐袁真至壽陽以淮南屢叛著論二篇名曰正淮

殷仲文少有文藻為東陽太守仲文善屬文為世所重謝靈運嘗云若殷仲文讀書半袁豹則文才不減班固言其文多而見書少也

晉陶潛字淵明或云淵明字元亮潯陽人少有高趣嘗

著五柳先生傳後為彭澤令解印綬賦歸去來辭與子書以言其志并為訓誡又為命子詩

王誕字茂世瑯琊人也少有才藻從叔尚書令珣為晉孝武哀策文久而未就謂誕曰猶少序節物一句因出本示誕攬筆便益之接其秋冬代變後云霜繁廣除風迴高殿珣嗟嘆清拔因而用之後終吳國內史

王曇首瑯琊人太保宏少弟也為瑯琊王大司馬屬從高祖至彭城大會戲馬臺與坐者皆賦詩曇首文先成

高祖覽讀因問宏曰卿弟何如卿宏答曰若但如下官門戶何寄高祖大笑

沈林子字敬士為高祖西中郎中兵參軍輔國將軍卒林子所作賦讚三言箴祭文樂府表牋書記論老子一百二十一首太祖後讀林子書集歎息曰此人作公應

繼王太保

太保王宏也

謝瞻字通遠陳郡人善於文章辭采之美與族叔混弟靈運相抗位至司空長史黃門郎

范泰字伯倫順陽人為侍中左光祿大夫國子祭酒博覽篇籍好為文章有文集傳於世

謝靈運陳郡人少好學博覽羣書文章之美江左莫逮從叔混特加愛之為世子中軍諮議黃門侍郎奉使慰勞高祖於彭城作撰征賦後為永嘉太守所至輒為詩詠以致其意焉在郡一周稱疾去職營別業於會稽每有一首詩至都邑貴賤莫不競寫宿昔之間士庶皆遍遠近欽慕名動京師作山居賦并自注以言其事又為

臨川內史以叛逆徙廣州棄市所著文章傳於世靈運詩書皆兼獨絕每文竟手自寫之文帝稱為二寶既自以名輩應參時政至是雖以文義見接每侍帝宴談賞而已

顏延之字延年瑯琊人也少孤貧居負郭室巷甚陋好讀書無所不覽文章之美冠絕當時為豫章公世子中軍行參軍晉安帝義熙中宋祖北伐遂有宗公之授府遣一使慶殊命參起居延之與同府王參軍俱奉使至

雒陽道中作詩二首文辭藻麗為謝晦傅亮所賞後為
始安太守延之之郡道經湘潭為湘州刺史張紀
祭屈原文以致其意後入為太子中庶子領步兵校尉
後出為永嘉太守乃作五君詠劉湛以其辭旨不遜大
怒以光祿勳車仲遠代之延之屏居里巷不豫人間者
七年閒居無事作庭誥之文後為光祿大夫延之與陳
郡謝靈運俱以詞采齊名而遲速懸絕文帝嘗各勅擬
樂府北上篇延之受詔便成靈運久之乃就延之嘗問

鮑昭已與靈運優劣昭曰謝五言如初發芙蓉自然可愛君詩若鋪錦列繡亦雕績滿眼延之每薄湯慧休詩謂人曰慧休制作委巷中歌謠耳方當娛後生事是時議者以延之靈運自潘岳陸機之後文士莫及江左稱潘陸江右稱顏謝焉

何承天東海剡人儒史百家莫不該覽為御史中丞時元魏侵邊文帝訪羣臣威戎御遠之畧承天撰安邊論遂遷廷尉未拜坐事免官卒所著文並行於世

何尚之字彥德廬江人為尚書令領太子詹事元嘉二十九年致仕於方山著退居賦以明所守

王韶之字休泰瑯琊人好史籍博涉多聞為黃門侍郎領著作郎領西省事凡諸詔奏皆其辭也後為祠部尚書領給事中守七廟歌辭詔之制也有文集行於世

江邃字玄遠濟陽人頗有文義官至司徒記室參軍撰文釋傳於世

袁淑字陽源陳郡人博涉多通好屬文辭彩道艷為太

子左衛率為元凶所害有文集傳於世

顧愿字子恭覬之弟子也好學有文辭覬之嘗以秉命有定分非智力所移惟應恭已守道信天任運而闇者不達妄求僥倖徒虧雅道無關得喪乃以其意命愿著定命論愿終於太子舍人

謝惠連陳郡人為彭城王義康法曹參軍是時義康治東府城城塹中得古冢為之改葬使惠連為祭文留信待成其文甚美又為雪賦亦以高麗見竒文章並傳於

世蚤卒

鮑昭字明遠東海人文辭瞻逸嘗為古樂府文甚道麗
元嘉中河濟俱清當時以為美瑞昭為河清頌其序甚
工昭嘗謁臨川王義慶未見知上詩言志義慶竒之後
為中書舍人又為臨海王子頊前軍參軍掌書記之任
王素字休業瑯琊人愛好文義不以人俗累懷累被徵
辟不就聲譽甚高因山中蛭蟲聲清長聽之使人不厭
而其形甚醜素乃為蛭賦以自況

齊劉繪魏使來繪以辭辨勅接魏使事畢當撰語辭繪
謂人曰無論潤色未易但得我語亦難矣繪能書善飛
白

王融字元長瑯琊人少而神明警慧博涉有文才為中
書郎永明九年武帝幸芳林園禊宴使融為曲水詩序
文藻富麗當世稱之豫章王薨帝哀痛特至蔬食積旬
大官朝送祭奠勅融為銘云半岳摧峰中河墜月帝流
涕曰此正吾所欲言也融文辭辨捷尤善綴屬有所造

作援筆可待為東昏所誅文集行於世

冊府元龜卷八百三十八